

Hronika / Chronik

Izvještaj o radu Centra za balkanološka ispitivanja u 2021. godini

U 2021. godini Centar za balkanološka ispitivanja ANUBiH je i pored brojnih ograničenja uslovljenih pandemijom COVID-19 uspio da ispuni sve planirane obaveze. Prije svega, zahvaljujući podršci Federalnog ministarstva obrazovanja i nauke Bosne i Hercegovine, Evroazijskog odjeljenja Njemačkog arheološkog instituta iz Berlina, kao i Fondacije za izdavaštvo Federalnog ministarstva kulture i sporta Bosne i Hercegovine, uspješno su završeni priprema i štampanje broja 49/2020. časopisa Godišnjak/Jahrbuch. Zbog navedene pandemije čitav ovaj proces je bio dosta usporen, pa je časopis odštampan i distribuiran u mjesecu maju 2021. godine. Priloge za ovaj broj časopisa dostavili su naučnici iz Italije, Slovenije i Bosne i Hercegovine. Radovi se odnose na arheologiju, lingvistiku, klasičnu istoriju i etnologiju. Objavljena su i tri prikaza knjiga kao i tri *sjećanja* za preminule članove Centra. Godine 2021. se obilježavaju dva značajna jubileja u našoj Akademiji. Jedan je 70 godina od osnivanja Akademije nauka umjetnosti Bosne i Hercegovine, a drugi je izdavanje 50. broja Godišnjaka/Jahrbuch-a Centra za balkanološka ispitivanja. Za ovaj jubilarni broj je nakon redakcijske i recenzentske selekcije prihvaćeno jedanaest radova i dva prikaza iz okvira arheologije i istorije. Autori tih priloga su naučnici iz Slovenije, Austrije, Hrvatske i Bosne i Hercegovine. Planirano je da ovaj jubilarni broj Godišnjaka/Jahrbuch-a izađe do kraja februara 2022. godine.

Uz redakcijske radove na objavljivanju aktuelnih brojeva Godišnjaka/Jahrbuch-a u Centru su preduzete aktivnosti vezane za registraciju časopisa u internacionalnoj bazi podataka *Scopus*.

U pripremi registracije postavljeno je deset zadnjih brojeva sa svim meta podacima časopisa u bazu *Open Journal System* koju od ove godine koristi naša Akademija. Jedan od osnovnih uslova za registraciju u *Scopusu* je i obezbjeđenje sredstava za redovno izlaženje časopisa, što predstavlja sistemsku i trajnu obavezu koju možemo ispuniti samo uz pomoć izvršnih organa naše Akademije. S obzirom na nova zakonska rješenja, ova registracija je postala obavezan preduslov za dalju egzistenciju našeg časopisa. Time bi Godišnjak/Jahrbuch u punoj mjeri postao referentan već od sljedeće godine, što znači da bi od tada objavljeni radovi bili na odgovarajući način vrednovani od strane svih relevantnih institucija u Bosni i Hercegovini i u regionu.

U 2021. godini intenziviran je rad na postavljanju dviju elektronskih datoteka koje su pripremljene u našem Centru: *Kartoteka prastanovnika Zapadnog Balkana* i *Građa za rječnik crkvenoslavenskog jezika*. U maju je na server ANUBiH postavljena *Kartoteka* i rađeno je na dodatnom čišćenju ilustracija. U drugoj polovini godine obezbijedena su finansijska sredstva i za postavljanje *Građe*. Obje datoteke programski je obradila Šeila Bećirović, MA, diplomirana inženjerka s Elektrotehničkog fakulteta UNSA, dok su nosioci posla bili članica Centra prof. dr. Lejla Nakaš, za *Građu* i prof. dr. Blagoje Govedarica, dopisni član ANUBiH, za *Kartoteku*. Postavljanje *Kartoteke* i *Građe* na server ANUBiH obavio je Eldin Hodžić, iz IT podrške ANUBiH. Ovaj projekat je podržalo Ministarstvo kulture i sporta Kantona Sarajevo. Trenutno je još u toku faza probnog ispitivanja funkcija datoteka koja prethodi zvaničnom puštanju u javni opticaj. U prvoj polovini 2022. godine planirana je promocija obje datoteke iz okvira ovog značajnog projekta. Puštanjem u opticaj ovih datoteka, odnosno davanjem naučnoj javnosti mogućnosti digitalne obrade i pretrage velikih baza naučnih podataka, naša Akademija će načiniti značajan iskorak u elektronskoj informatici.

U toku ove godini nastavljena je obrada arheološkog materijala sa Glasinačkog područja koji je sakupljen istraživanjima Centra za balkanološka ispitivanja ANUBiH u periodu 1980–1991. godine. Rukovodilac ovih radova je dopisni član ANUBiH i član našeg Centra, prof. dr. Blagoje Govedarica. U tom smislu su tokom septembra obavljena nova arheološka i geofizička rekognosciranja na prastarijskom naselju Klisura u Kadića brdu, kod Knežine. Ova istraživanja su izvedena uz odobrenje Republičkog zavoda za zaštitu spomenika Republike Srpske, a u njima su, osim našeg Centra, učestvovali i saradnici Instituta za arheologiju Filozofskog fakulteta Univerziteta u Sarajevu i Zavičajnog muzeja u Doboju. Finansijsku podršku dalo je Evroazijsko odjeljenje Njemačkog arheološkog instituta iz Berlina.

Na sjednici Predsjedništva ANUBiH, održane 30. novembra 2021. godine, dopisni član ANUBiH i dugogodišnji urednik časopisa *Godišnjak/Jahrbuch* izabran je za novog direktora Centra za balkanološka ispitivanja ANUBiH. Na toj dužnosti naslijedio je dugogodišnjeg direktora Centra, akademika Dževada Juzbašića.

Sabina Vejzagić